

ARRÜNA PRIMER ÑACONOMOSORRTI SAN JUAN

Ui nurarrti Tuparrü bachebo osüboriquibo

1 ¹Raconomoca icütüpüti Cristo, naqui nürirtito “Nurarrti Tuparrü”. Uiti osüboriquia. Arrti anancatiatai auqui ñemonco. Tüsumasacati ui suisütoatoe. Somoncoi ñanitacarri. Sopiñenta nicütüpürri. ²Tonenti naqui uiche osüboriquia. Itusiancanatiyü suisucarü. Sumasacati. Terrticurri somü ümoti. Suburapoi ausucarü, que uiti torrio oemo osüboriquibo. Anancati tücañe esati Yaiütoti au napese. Auqui taha cuati icu na cürri. Itusiancanatiyü suisucarü. ³Sane nauquiche suburapoi ausucarü arrüna sumarrtai y somoncoi, sane nauqui arraño ito abaca suichepe y ichepetito Tuparrü, naqui Uyai, y ichepeti Jesucristo, naqui Aütorrti. ⁴Supaconomoca tanu aume, nauqui ane urriampae upucünuncubo.

Arrti Tuparrü tacana basarurrti

⁵Tone arrüna manitacarri somoncoi uiti Jesús: Arrti Tuparrü tacana basarurrti, champü isane tomiquianene esati. (Itopiqui arrüna nomünantü tone tacana tomiquianene.) ⁶Arrtü usucana oñü que usaca ichepeti Tuparrü y anati au nuyausasü, pero seguibo oñü nubavivi eana tomiquianene, o sea eana nomünantü, ñapanrrü oñü au nosüboriqui ui arrüna sane nubachücoi. Chübaviviquiapü isiu arrüna ñemanauntu manunecatarri. ⁷Tapürtrü urria nosüboriqui baviviquia au nanentarrü, tacana nacarri Tuparrü eana nanentarrü; auqui caüma urria numaquionco oemoantoe, humanauntacaiquipü, tichepe nusaca, y morrimiacana tato nanaiña nomünantü osoi ui notorrti Jesucristo, naqui Aütorrti Tuparrü, itopiqui arrti coiñoti otopiqui.

⁸Arrtü usucana oñü: “Champü nomünantü osoi”, oñencañaca oemoantoe, chuicocotapü arrüna ñemanauntu manunecatarri. ⁹Tapürtrü usurapoi arrüna nomünantü osoi isucarüti Tuparrü, morrimiacana tato uiti oemo. Puerurrü te oñoncatü ümoti, itopiqui arrti nantarrtai cocono

uiti nurarrti. ¹⁰Arrtü usucana oñü: “Champü isane nomünantü osoi”, tusucana oñü ito que arrti Tuparrü ñapanrrti, itopiqui arrti nanti que ane nomünntü osoi. Tapü arroñü chuicocotapü nurarrti.

Arrti Cristo ocümanati utacu

2 ¹Masaütaiqui, rraconomoca aume arrüna sane, nauqui tapü apisamute nomünantü. Tapürrtü anati naqui isamute nomünantü, tari aquionotiyü iyoti Jesucristo, naqui anati au napese esati Bae Tuparrü, naqui manitanabo ümoti Tuparrü utacu. ²Auqui nacarrti puerurrü amorrimiaca tato nomünantü osoi, y arrüna ito nomünantü ui namanaiña macrirrtianuca icu na cürrü, itopiqui arrti coiñoti utacu. Urrian tato ñaquioncorrti Tuparrü usaübu. ³¿Uiche puerurrü atusi oemo, arrtü ñemanauncurratoe uisuputacati Tuparrü? Tusio ui arrüna arrtü uicocoquio arrüba yacüpurrti. ⁴Arrti naqui nanti: “Isuputacati Tuparrü”, pero chümacoconaurrtipü ümoti, tonenti naqui ñapanrrü. Chicocotatipü arrüna ñemanauntu. ⁵Pero arrtü uisamute isiu yacüpurrti, uirri tusio que chauqui tücuasürüti Tuparrü oemo. Uirrito tusio oemo que usaca ichepeti. ⁶Arrti naqui nanti que anati Tuparrü au nausasürri, tiene que aiñanti nisüboriquirrti tacana nisüboriquirrti Jesús tücañe.

Arrüna nuevurrü bacüpurrrü

⁷Masaruquitaiqui, champürrtü racüpuca aume taman bacüpurrrü nuevurrü, ta rraconomoca aume icütüpü arrüna bacüpurrrü tanancatai auqui maübo. Chauqui tamoncoi. ⁸Pero ta ñemanauncurratoe sucanañü aume, arrümanu bacüpurrrü siemprerrü nuevurrü, itopiqui arrüna tomiquianene nesa nomünantü icu na cürrü tirranrrü atacüru, iconobo arrüna ñemanauncurratoe nanentarrü uiti Tuparrü. Arraño urria nausüboriqui naneneca, itopiqui apisamute isiu manu bacüpurrrü (o sea aucuasürüca aumeampatoe), tacana arrüna isamutenti Jesús tücañe.

⁹Arrti naqui nanti que anati au nanentacarrrti Tuparrü, pero tüboricotiatái ümoti yaruquitorrti, tonenti naqui anati eana tomiquianene nesa nomünantü. ¹⁰Arrti naqui cuasürüti quiatarrü ümoti, tonenti naqui anati eana nanentacarrrti Tuparrü. Champü isane uiche aiñamesoco nisüboriquirrti. ¹¹Tapü arrti naqui tüboricatai ümoti yaruquitorrti, tonenti naqui tacanarrtü amencoti eana tomiquianene, chütusiopü ümoti cauta niyücürri. Anati tacanarrtü supusoti ui tomiquianene.

¹²Iconomota arrüna sane aume, bama masaütaiqui, itopiqui chauqui tümorrimiacana tato arrüba nomünantü aboi auqui nacarrrti Jesucristo.

¹³Rraconomoca ito tanu aume, bama mayaütaiqui, itopiqui ñemanauncurratoe apisuputacati Cristo, naqui anancatiatai auqui ñemonco. Rraconomoca ito tanu aume, bama mayaüca, itopiqui arraño apacanaca ümoti choborese.

¹⁴Suraboira tatito: Arraño bama masaütaiqui apisuputacati nurria Bae Tuparrü. Isiatái arraño bama mayaütaiqui apisuputacati nurria

Cristo, naqui anancatiatai auqui ñemonco. Y arraño bama mayaüca ane naucusüu uiche apahi ümoti choborese. Chütacürusupü napaquionco iyo nurarrti Tuparrü, y apacanaca ümoti choborese.

¹⁵Tapü aurrianca ñome arrüba abe icu na cürrü. Itopiqui arrtü tarucapae naurrianca ñome, chüpuerurrüpi acuasürüti Tuparrü aume, naqui Uyaü. ¹⁶Amasasai te arrüna pasabo icu na cürrü: Arrübama macrirrtianuca tarucu nirrancarrüma ümo nanaiña ümomantoe. Arrtaimia nenarrirri, chauqui tirranrrüma ümo. Tarucu nivianucurrüma. Arrüna sane nisonirrimia, ta icuqui nantai cürrü, champürrtü uiti Bae Tuparrü. ¹⁷Arrüna currü aübu nanaiña arrüba nirrancarrüma macrirrtianuca icu chururaupü. Tapü arrti naqui isamutenti isiu nirrancarrti Tuparrü iyebo uiti ñana esati auna cauta champü nitacüru nisüboriquirrti.

Artri naqui tüboricatai ümoti Cristo

¹⁸Masaütaiqui. Chauqui tuiñatai au na nitacüru tiemporrü (auche ayeti tato Cristo). Chauqui tamoncoi nürirrti maniqui churriampü ümoti arrüna urria uiti Cristo. Artri maniqui ünantatai ñoñünrrü tiene que ayeti ñana icu na cürrü. Pero chauqui tütaboma sürümanama bama tacana nacarrti maniqui icu na cürrü. Uirri tusio oemo que tüsaimia nitacüru na tiemporrü. ¹⁹Arrümanuma tüboricatai ümoti Cristo amoncoma tücañe ochepe, bama icocoromati Cristo, abu chüñemanauntupü nacarrüma ochepe. Arrtü ñemanauntupü, süsiopüma ochepe. Pero como chüñemanauntupü, iñoconoma oñü. Uirri tusio, chüpertenecebopüma oemo.

²⁰Arraño chauqui tütusio aume arrüna ñemanauntu, itopiqui arrti Cristo icüpurutiti Espíritu Santo au nabausasü. ²¹Champü nümoche rraconomonacañü tanu aume arrüna ñemanauntu, itopiqui chauqui tütusio aume. Pero rraconomoca aume, nauqui tapü tacürusu napaquionco iyo arrüna ñemanauntu manunecatarrü. Tusio aume, champü isane mapancarrü ane ahu.

²²¿Causane nauqui puerurrü uisuputarama bama tüboricatai ümoti Cristo, bama mañapanca? Arrübama te namatü que arrti Jesús chitonentipü Cristo naqui Aütorrti Tuparrü. Artri naqui sane nurarrti, chicocorotitipü Aütorrti Tuparrü, y chicocorotitipito Bae Tuparrü. ²³Artri naqui chicocorotitipü Jesús naqui Aütorrti Tuparrü, chicocorotitipito Tuparrü, naqui Uyaü. Tapü arrti naqui yasuriurutiti Cristo, yasuriurutitito Bae Tuparrü.

²⁴Sane nauquiche amasasai nurria, apiñahübu au nabausasü arrüna manitacarrü amoncoi auqui maübo, tapü tacürusu napaquionco iyo. Arrtü apisamute sane, urria nacarrti Jesús a nabausasü, naqui Aütorrti Tuparrü, y tacane ito arrti Bae Tuparrü urria nacarrti au nabausasü. ²⁵Tone arrüna nurarrti Cristo oemo tücañe. Rranrri acheti osüboriquibo arrüna chütacürusupü.

²⁶Tone arrüna surapoi ausucarü icütüpü bama rranrrüma atachemacama aume. Tapü apichücaño ümoma. ²⁷Arraño tütorrioti aume Espíritu Santo au nabausasü uiti Cristo. Artri Espíritu Santo iñununecanati

año nanaiña arrüna urria. Sane nauquiche champü nümocheti quiatarrü nauqui anunecati aume. Y arrüna ñanunecacarrti aume es ñemanauntu, chümapañatipü. Apicoco arrüna ñanunecacarrti. Abasiquia ichepeti Cristo.

²⁸Sane te masaitaiqui, abasiquia ichepeti, nauqui puerurrü barrüpera cümenuti aübu nupucünuncu. Champü isane uiche ocüso, arrtü cuatati. ²⁹Tusio aume que arrti Jesús tücañe champü nipünatenti, nacarrti icu na cürrü. Sane ito tusio aume que namanaiña bama urria nisüboriquirrimia tonema aütorrti Tuparrü.

Arrübama aütorrti Tuparrü

3 ¹Amasasai arrüna tarucu nucua ümoti Tuparrü, naqui Uyaü. Itopiqui arrti nanti que arroñü caüma aütorrti. Ñemanauncurratoe sane caüma nusaca. Arrübama macrirrtianuca icu na cürrü chentienderrüpüma arrüna usaca aübu, itopiqui chisuputaramatipü Tuparrü. ²Masaruquitaquí, bama cuasürü ñemo, chauqui taütorrti Tuparrü oñü auna icu na cürrü. Chütusiopü oemo causane nusaca au cuantio naneneca. Pero chauqui tütusio oemo, arrtü cuati tato ñana, iyebo osoi tacana nacarrti, y puerurrü basarati nurria. ³Namanaiña bama barrüperara ümo arrüna sane ñana, ñinatama urria nisüboriquirrimia tacana nisüboriquirrti Cristo tücañe, champü isane nomünantü uiti.

⁴Artri naqui isamutenti nomünantü, itompücatai nüriacarrti Tuparrü. Itopiqui enterurrü nomünantü es matompücacarrü ümo nüriacarrti. ⁵Tusio aume que arrti Cristo cuatati tücañe icu na cürrü, nauqui aiquiaübuti arrüna nomünantü osoi, abu arrti champü isane nomünantü uiti. ⁶Artri naqui anati ichepeti nurria, chüseguibotipü aisamunentiqui nomünantü. Itopiqui artri naqui seguiboti aisamunenti nomünantü, chiyebopü uiti tacana nacarrti, y chisuputaratipü. ⁷Masaitaiqui, tapü apichücaño ümo bama rranrrüma encañama aume. Arrtü urrianca nauqui urria nusaca aübuti Tuparrü, uisamunena te arrüna urria, tacanati Cristo tücañe isamutenti urria. Uirri te urria nacarrti au narrtarrti Tuparrü. ⁸Itopiqui artri naqui masamunu nomünantü, baserebioti ümoti choborese, itopiqui artri choborese nomünantü nacarrti auqui maübo. Pero artri Jesús, naqui Aütorrti Tuparrü, cuati icu na cürrü nauqui aiñarrimiatati nanaiña arrüba chomirriampü nizamucurrti choborese.

⁹Arrübama ñemanauncurratoe aütorrti Tuparrü chisamutempüma nomünantü, itopiqui anati Espíritu Santo au nausasürüma. Chüpuerurrüpiü aisamunema nomünantü, itopiqui tütörrio nuevurrü isüboriquiboma uiti Tuparrü. ¹⁰Tapü artri naqui isamutenti nomünantü, y tüboricotiatái ümoti yaruquitorrti, chüpertenecebotipü ümoti Tuparrü. Uirri puerurrü atusi oemo ñacubama aütorrti Tuparrü y ñacubama aütorrti choborese.

Aucasürü aumeantoe

¹¹Tone arrüna manitacarrü tamoncoi auqui maübo: Tari ucuasürüra oemomatoe. ¹²Tapü uisamute tacanati Caín tücañe, naqui itabairotiti yaruquitorrti.

Artri macoconaunrti ümoti choborese. ¿Itopiquiche aítabajotiti tücañe? Itopiqui enterurrü nisüboriquirrti pururrü nomünantü. Tapü artri maniqui yaruquitorrti nanaiña arrüna isamutenti au nisüboriquirrti bien urria. Artri Caín ubatoti.

¹³Pero tütusiatai aume, masaruquítaiqui, que saneantai niyachücoimia bama macrirrtianuca icu na cürrü ümo bama urria nisüboriquirrimia. Sane nauquiche tapü aucütobüca, arrtü tüboricomantai aume. ¹⁴Itopiqui arroñü chauqui tücampiabo nosüboriqui. Chauqui tüñocota nomünantü arrüna uiche aipeneno oñü au infierno. Chauqui tütorrio oemo ñemanauncurratoe usüboriquibo uiti Tuparrü, itopiqui ocuasürüca oemoantoe. Tapü artri naqui chücuasürütipü quiatarrü ümoti, tonenti naqui penecoti ümo carrticurrü ümo para siemperrü, itopiqui churriampü nacartri au narrtartri Tuparrü. ¹⁵Artri naqui tüboricatai ümoti yaruquitorrti, nacartri caüma au narrtartri Tuparrü tacanati yatabayorrü. Tusio te aume, arrübama mayatabayoca chüpuerurrüpi atorri isüboriquiboma arrüna chütacürusupü. ¹⁶Artri Cristo itorrimianatiyü uirrtiatoe, nauqui aconti otopiqui. Uiti tusio oemo arrüna tarucu nucua ümoti. Sane nauquiche arroñü ito tiene que uitorrimia nosüboriqui itacuti usaruqui. ¹⁷Supiarrtü anati naqui rricurrü nanti que cuasürüti Tuparrü ümoti. Asaratiti yaruquitorrti taquisürüti, pero chübayuraratipü ümoti. Artri maniqui ñonünrrü mapañatiatai arrüna nicuartri Tuparrü ümoti. ¹⁸Amasasai nurria masaitaiqui, tapü manitacartri arrüna nucua oemomatoe, tari ñemanauncurratoe. Tiene que atusi nicuartri quiatarrü oemo ui arrüna nubayuraca ümoti.

Oñoncatü ümoti Tuparrü aübu nupucünuncu

¹⁹Artrü uisamute sane, tusio oemo que ta macoconaunca ümo arrüna ñemanauntu manunecatarrü. Sane nauquiche puerurrü oñoncatü ümoti Tuparrü. Champü nuirruca ñünanati. ²⁰Itopiqui arrtü oñonquisio arrüna nuipünate au nuyausasü, artri Tuparrü manrrü tusio ümoti oñopünanaqui nanaiña arrüna nuipünate, itopiqui artri nanaiñantai tusio ümoti. ²¹Tapü arrtü choñonquisiopü nuipünate, puerurrü oñoncatü nurria ümoti. ²²Y artri itorrimiatati oemo nanaiña arrüna manquiquia, itopiqui uicocota yacüpuccurrti, uisamute arrüna urria ümoti. ²³Tone arrüna yacüpuccurrti oemo: Tiene que uicocoroti Jesucristo, naqui Aütörtri, y tiene que ucuasürü oemoampatoe, tacana arrüna yacüpuccurrti Cristo oemo. ²⁴Artri naqui macoconaunrrü ümoti Tuparrü, anati ichepeti, y artri Tuparrü anati au nausasürtri. Tusio te oemo que anati Tuarrü au nuyausasü uiti Espíritu Santo, naqui torrioti oemo.

Artri Espíritu Santo y bama mañencañaca

4 ¹Amasasai nurria masaruquítaiqui, arrtü aboma bama namatü: “Arrüñü rranunecaca uiti Espíritu Santo”. Tapü apicocotatai nurarrüma. Amasasai nurria arrtü ñemanauncurratoe uiti Tuparrü ñanunecacarrüma. Itopiqui aboma sürümanama mañapanca au nanaiñantai, namatü que manitanama au nürirrti Tuparrü, abu ñapanturrüma. ²Puerurrü te atusi

aume ui arrüna sane: Arrtü urapoimia que arrti Jesucristo isamunutiyü ñemanauncurratöe ñoñünrü aübu cürü nicütüpürrti, auqui caüma tusio aume que uiti Tuparrü ñanunecacarrüma. ³Arrtü chüsanempü ñaniticarrüma icütüpüti Cristo, champürrti uiti Tuparrü ñanunecacarrüma. Mapensarama tacanati maniqui tüboricatai ümoti Cristo, naqui cuabotü icu na cürü. Pero chauquito tütaboma bama mapensarama tacanati maniqui.

⁴Pero arraño masaütaiqui tapicococati Tuparrü. Tapacanaca ümo bama mañapanca, itopiqui anati Espíritu Santo au nabausasü. Arrti ane manrü nüriacarrti pünanaquiti choborese, aquí üriabucati ümo bama maquiataca macirrtianuca icu na cürü. ⁵Arrübama mañapanca perteneceboma ümo na cürü, y manitanama icuqui nantai cürü. Sane nauquiche arrübama macirrtianuca icocotama nurarrüma. ⁶Pero arroñü pertenecebo oñü ümoti Tuparrü. Arrübama icocormati Tuparrü onsapetioma nusura y icocotama. Tapü arrübma chüpertenecebopüma ümoti Tuparrü chicocotapüma nusura. Ui arrüna sane puerurrü atusi oemo ñacubama manunecanama arrüna ñemanauntu, y ñacubama manunecanama arrüna mapancarrü.

Ucuasürüca ümoti Tuparrü

⁷Masaruquitaliqui, bama cuasürü inemo, tari ocuasürüra oemoantoe. Itopiqui arrti Tuparrü tarucu ñacumananauncurrti oemo. Arrtü ucuasürüca oemoantoe, tusio que aütorrti Tuparrü oñü, y tuisuputacati nurria. ⁸Arrti naqui chümacumananaumpü ümoti quiatarrü, chisuputaratitipü Tuparrü, itopiqui arrti tarucu nucua ümoti. Sane nacarrtiatöe. ⁹Arrti Tuparrü itusiancatati nucua ümoti ui arrüna icüpurutiti naqui tamantiatai Aütorrti icu na cürü, nauqui ane osüboriquibo ümo para siemperrü. ¹⁰Arroñü tücañe champü nicuarrrti Tuparrü oemo. Pero ucuasürüca ümoti. Icüpurutiti naqui Aütorrti nauqui aconti otopiqui, nauqui amorrimiaca tato arrüba nomünantü osoi. Sane arrüna naca nucua ümoti.

¹¹Bueno bama masaruquitaliqui, barrtai te arrüna tarucu nucua ümoti Tuparrü, sane nauquiche macumananauna ito oemoantoe. ¹²Tusio oemo que chüpuerurrüpü basarati Tuparrü. Pero arrtü ucuasürüca oemoantoe, anati Tuparrü au nuyausasü. Uirri caüma manrü ucuasürüca oemoantoe, y urriampae nosüboriqui. ¹³Arrti icüpurutiti Espíritu Santo au nuyausasü. Uirri tusio oemo que usaca ichepeti Tuparrü, y arrtianati au nuyausasü. ¹⁴Arrüsomü sumarrtai y suburapoito que arrti Bae Tuparrü icüpurutiti naqui Aütorrti icu na cürü, nauqui aitaesümununuti oñü eanaqui nomünantü. ¹⁵Arrti naqui urapoi que arrti Jesús tonenti Aütorrti Tuparrü, anati ichepeti Tuparrü y arrti Tuparrü anati au nausasürri.

¹⁶Tütusio nurria caüma oemo ta ucuasürüca ümoti. Uicocota arrüna manunecarrü. Suraboira tatito: Arrti Tuparrü tarucu nucua ümoti. Sane nacarrtiatöe. Arrti naqui macumananaunrrü ümo maquiataca anati ichepeti Tuparrü y arrti Tuparrü anati au nausasürri. ¹⁷Arrtü cuasürüti Tuparrü oemo, champü nuirruca ñünana manu nanenese nesa bacurrtacarrü ñana,

itopiqui urria nosüboriqui icu na cürrü, tacana nisüboriquirrti Cristo tücañe. ¹⁸Sane nauquiche champü nümoche uirru ñinanati naqui tarucu nucua ümoti, y arrti cuasürüti oemo. Itopiqui arrti naqui birrubu ñinanana manu carrticurrti, es itopiqui choncotitüpi nurria ümoti Tuparrü.

¹⁹Cuasürüti Tuparrü oemo, itopiqui primero ucuasürüca ümoti. ²⁰Supiarrtü anati naqui nanti sane: “Cuasürüti Tuparrü iñemo”, pero tüboricotiatái ümoti yaruquitortti. Arrti naqui ñoñünrrü mapañati. Itopiqui arrti naneneca asaratiti yaruquitortti, abu chücuasürütipü ümoti. Quiubupü acuasürüti Tuparrü ümoti, naqui chüpuerurrüpü asaratiti. ²¹Artri Cristo bacüpuruti oemo sane: “Artri naqui cuasürüti Tuparrü ümoti, tiene que acuasürütito yaruquitortti ümoti”.

Numacanaca ñome nomünantü icu na cürrü

5 ¹Namanaiña bama icocotama, que arrti Jesús tonenti Cristo, tonema bama aütorrti Tuparrü. Arttü cuasürüti oemo taman ñoñünrrü, tiene que acuasürüma ito oemo bama aütorrti. ²Sane ito arttü cuasürüti Tuparrü oemo, y uicocota arrüna yacüpuurrti, auqui caüma cuasürüma ito oemo bama maquiataca icocoromati Jesús. ³Tusio nicuartri Tuparrü oemo ui arrüna uicocoquio arrüba yacüpuurrti. Chücuerrtarrüpü uicocorio. ⁴Itopiqui namanaiña bama tisamunumacü aütorrti Tuparrü tümacanana ñome ba nomünantü icu na cürrü ui arrüna icocoromati Cristo. ⁵Champüti puerurrü acanati uirrtiatöe ümo nomünantü icuqui na cürrü, arttü chicocotatipü que artri Jesús tonenti Cristo, naqui Aütorrti Tuparrü.

Arrüna uiche atusi oemo nacartri Cristo

⁶Artri Jesucristo itusiancanatiyü auna icu na cürrü tacana Aütorrti Tuparrü ui turrü y ui notorrtü, o sea nauquiche ürioti y nauquiche coiñoti apü curusürrü. Champürrtü cunauntañantai ui nüriquirrti tusio oemo que Aütorrti Tuparrü, ta uito niconcorrti. Artri Espíritu Santo terrticurrti ümo arrüna sane, y nanaiña arrüna urapoiti Espíritu Santo ta ñemanauntu. ⁷Así que abe trerrü piaracaca uiche atusi oemo que artri Jesús tonenti Cristo: ⁸Primero: Arrüna ñanitacartri Espíritu Santo au nuyausasü. Segundo: Arrüna ñanitacartri Tuparrü numo ürioti Jesús. Tercero: Arrüna ñanitacartri Tuparrü, numo tüsai aconti Jesús. Arrüba trerrü manitacaca uburapoi que artri Jesús tonenti Aütorrti Tuparrü. ⁹Arroñü nantarrai uicocota nurarrüma bama terrticurrti auna icu na cürrü. Pero manrrü valeo arrümanu ñanitacartri Tuparrü icütüpüti naqui Aütorrti. ¹⁰Así que artri naqui icocorotiti naqui Aütorrti Tuparrü tütusiatái au nausasürrti que ñemanauntu arrümanu ñanitacartri Tuparrü icütüpüti Aütorrti. Tapü artri naqui chicocorotitipü Tuparrü nanti que ñapanrrti Tuparrü, itopiqui chicocotatipü arrüna nurartri icütüpüti naqui Aütorrti. ¹¹Tone arrümanu nurartri: Artri Tuparrü tübacheboti osüboriquibo, arrüna chütacüirusupü. Torrio oemo mecuquiti naqui Aütorrti. ¹²Artri naqui anati Aütorrti Tuparrü au nausasürrti, ane isüboriquiboti. Tapüti naqui champüti Aütorrti Tuparrü au nausasürrti, champü isüboriquiboti.

Tacürurrü ñacuansomococorrti San Juan

¹³Rraconomoca aume arrüna sane, nauqui atusi aume, ta tütörrio ausüboriquibo, arrüna chütacürusupü. Itopiqui arraña chauqui tapicococati naqui Aütörrti Tuparrü.

¹⁴Arroñü oñoncatü nurria ümoti Tuparrü, itopiqui arrtü manquiquia pünanaquiti isiu arrüna urria ümoti, oncoiti noñeanca. ¹⁵Tusio oemo que oncoiti. Sane nauquiche tusio ito oemo que itorrimiatati oemo arrüna manquitio pünanaquiti.

¹⁶Supiarrtü anati naqui asaratitü ümoti yaruquitörrti isamutenti nomünantü, arrüna puerurrü arrimiaca tato. Tari meaboti ümoti Tuparrü maniqui arrtai, nauqui asuriurutiti tato Tuparrü maniqui isamutenti nomünantü. Pero ane ito arrüna nomünantü chüpuerurrüpü arrimiaca tato. Chisucanapüñü nauqui apean itacu bama isamutema sane. ¹⁷Nanaiña arrüna nomünantü ta churriampü ümoti Tuparrü, pero ane arrüna nomünantü puerurrü arrimiaca tato.

¹⁸Tusio oemo que arrübama aütörrti Tuparrü, bama icocoromati, chasiopüma aisamunema arrüna nomünantü, itopiqui arrti Cristo bayurarati ümoma. Champü causane uiti choborese ümoma.

¹⁹Tusio ito oemo pertenecebo oñü ümoti Tuparrü. Pero namanaiña bama maquiataca macirrtianuca icu na cürrü aboma iquiana nüriacarrti choborese.

²⁰Tusio ito oemo que arrti Aütörrti Tuparrü cuati tücañe icu na cürrü. Iñununecanati oñü nauqui puerurrü uisuputarati naqui ñemanauncurratoe Tuparrü. Usaca ichepeti Tuparrü auqui nacarrti Jesucristo, naqui Aütörrti. Tonenti ñemanauncurratoe Tuparrtito. Uiti torrio oemo osüboriquibo, arrüna chütacürusupü. ²¹Masaütaiqui, tapü apanaunca ümo bama masantuca, arrübama urriancama ui mañoñüncatai.